

明

通

鑑

明通鑑卷八十四

江西永甯知縣當塗夏燮編輯

紀八十四

起開達掩茂盡旃  
蒙天淵獻凡二年

莊烈皇帝

崇禎七年春正月己丑廣鹿島副將尙可喜降于

大清可喜故隸總兵黃龍部下至是因龍死遂降 設

河南山陝川湖五省總督以延綬巡撫陳奇瑜兼兵部

侍郎爲之初流賊旣自秦入晉掠河北畿南關中患少

紆奇瑜時撫延綬復分遣文武將吏禽斬賊渠截山虎

等百七十七人它賊多解散獨鎮天哨開山斧據永甯

關關在鎮城東前阻山下臨黃河賊負固數年不下奇  
瑜謂是不可以力取乃陰簡銳士陽言總制檄發兵令  
賀人龍將之而西身爲後勁直抵延川俄策馬東曰視  
吾馬首所向潛師疾走入山賊不虞大兵至驚潰焚其  
巢斬首千六百有奇二賊俱馘分兵擊斬賊首一座城  
等獲首級五百五十延水羣盜盡平奇瑜威名著關陝  
至是賊南渡河躡湖廣窺四川廷議諸鎮撫事權不一  
宜設大臣統之多推薦洪承疇以承疇方督三邊不可  
易乃命奇瑜總督五省軍務專辦流賊 庚寅總兵官  
張應昌渡河敗賊于靈寶 壬辰賊自鄖陽渡漢薄穀

城癸巳犯襄陽又分犯紫陽平利澠池教諭羅世濟子

得鴻練兵守平利殺賊頗多城陷妻子俱死

致無殉難錄所載與

三編同且書澠池教諭羅世濟之子尤爲明折今據書之賊遂擁衆南入四川乙卯

陷房縣知縣貢從貴死之又陷保康知縣方國儒竹溪

訓導王紹正死之

三編質實國儒率鄉兵出禦力不支城陷被執罵賊中七刀死

先是

諸將追賊于河南自張應昌外湯九州李卑敗之嵩縣

內鄉及入湖廣卑又敗之光化賊聞官軍至輒以老弱

委之而精銳多前走故諸將動稱捷報功賊勢彌熾連

陷鄖陽諸屬邑遂入蜀 二月壬戌賊陷興山殺知縣

劉定國縱掠歸州巴東夷陵歸巴萬山稠疊箐薄密綿

賊入其中首尾排迨荊州推官劉振纓提施兵入援斬獲頗多會施兵緣援荆東下舍之勿追王申賊入瞿塘戊寅遂攻夔州夔關天險而城中倉猝無備通判推官悉遁同知何承光攝府事率吏民固守力竭城陷承光整衣冠危坐賊入殺之投屍于江遂陷夔州連陷大甯知縣高日臨乞援不應率民兵捍賊北門兵敗被執大罵不屈賊碎其體焚之訓導高錫巡檢陳國俊皆被殺國俊之妻及錫妻女皆殉焉又陷巫山通江巡檢郭纘化指揮王永年戰沒于陣自賊起陝西轉犯山西畿輔河南北及湖廣四川陷州縣以數十計未有破大郡者

至是夔郡失守遠近震動賊所過輒殘破惟梁山以里  
居中書涂原集鄉兵伏密箐間用竹畚囊石乘高擊之  
傅毒弩矢血濡縷輒斃賊多死者乃退去會秦良玉自  
石砭赴援川北副將張令復以兵扼諸要害賊不敢進  
乃析其黨爲二一走還楚一自通江走廣元冲百丈關  
殺守備郭震辰指揮田實由七盤陽平關入秦抵鞏昌  
總督洪承疇禦之秦州賊遂越兩當襲破鳳縣主簿吉  
永祚將謝事歸會賊至知縣棄城遁永祚曰吾雖小吏  
嘗食祿于朝敢以謝事推諉乎城破北向再拜與子士  
樞士模皆死之訓導李芝蔚鄉官魏炳同時遇害

效興  
以上

賊犯地方及諸死事之文武悉據三編書之益參明史  
陳奇瑜張應昌揚九州李卑及忠義傳流賊傳而證之  
綏寇紀畧及殉節錄悉合惟郭震辰戰死于百丈關史  
稿誤入之六年三月下今據三編及殉節錄改入是年

振登萊被寇者竝蠲積逋 甲申耕藉田 乙酉流

賊自商雒復入漢南時賊之入秦者又析其黨爲二一

由鳳縣奔寶雞汧陽一向漢中取間道犯城固洋縣東

下石泉漢陰鄉官楊呈秀官順慶知府罷歸佐有司守

禦力戰被執大罵賊怒磔之其弟呈芳單騎入賊營斬

賊數十剗重死賊尋會于漢中以窺商雒商州防守閭

調化勦賊于雒不克被執不屈死于是張獻忠亦自應

山西奔商雒以十三營流入漢南 三月丁亥朔日有

食之 甲辰賜劉理順等進士及第出身有差 乙巳  
流賊自蜀還楚總兵張應昌擊之五嶺山敗績應昌身  
中一矢退還賊遂入楚庚戌副將楊世恩追敗入楚之  
賊于石河口 山西自去年八月不雨至于是月赤地  
數千里民大饑人相食陝西亦旱 夏四月丙辰逮鄖  
陽撫治蔣允儀下獄鄖西陷故也以大名副使盧象昇  
代之 癸酉振山西陝西饑給事中吳甘來請之也甘  
來請發粟以振因言山西總兵張應昌等多殺良民昌  
功中州諸郡畏官兵甚于賊陛下生之而不能武臣殺  
之而不顧臣實痛之又言賞罰者將將大機權也陛下

加意邊陲賞無延格乃閩海獻捷黔蜀爭功待勘累年  
急則用其死綏綏則束以文法況封疆之罰武與文二  
內與外二士卒與將帥二受命建牙或逮或逐而跋扈  
將帥罪狀已暴止于戴罪偏裨不能令士卒將帥不能  
令偏裨督撫不能令將帥將聽賊自來自去誰爲陛下  
剪凶逆者疏入上爲發帑振飢而軍政無章如故一是  
月賊自湖廣走盧氏靈寶時賊復分其黨爲三一犯均  
州往河南一犯鄖陽往浙川一渡河犯商南 五月丙  
申洪承疇遣副將賀人龍等逐賊于藍田敗之 是月  
上因旱求言給事中黃紹傑疏論溫體仁畧曰漢世災

異策免三公宰執亦因罪以求罷今者久旱陛下修明  
政治納讜言可謂應天以實矣而雨澤不降何哉天有  
所甚怒而不解也次輔溫體仁者秉政數載上千天和  
無歲不旱暵無日不風霾無處不盜賊無人不愁怨秉  
政既久窺覘益工中外趨承益巧一人當用則曰體仁  
意未遽爾也一事當行則曰體仁聞恐不樂也覆一疏  
建一議又曰慮體仁有他屬不然則體仁忌諱無撓其  
兇鋒也凡此召變之尤願陛下罷體仁以回天意體仁  
罷而甘霖不降殺臣以正欺君之罪上方眷體仁貶紹  
傑一秩體仁疏辨且訐其別有指授紹傑言廷臣言事

指及乘輿猶荷優容一字涉體仁必遭貶黜誰不自愛  
爲人指授也因列其罪狀且曰臣所仰祝聖明洞燭體  
仁奸欺者其說則有兩端下惟朋黨一語可以箝言官  
之口挑善類之禍上惟票擬一語可以激聖明之怒蓋  
憤誤之愆體仁猶辨且以朋黨爲言紹傑遂言體仁受  
銅商王誠金體仁長子受巡撫沈棨及兩淮巡鹽高欽  
順等金皆萬計體仁用門幹王治東南之利皆其轉輸  
體仁私邸兩被盜失黃金寶玉無算匿不敢言上怒調  
紹傑上林苑署丞遷行人司副六月辛未總督陳奇  
瑜與鄖陽撫治盧象昇會師于上津勦湖廣賊甲戌

河決沛縣 是月陳奇瑜勦賊駐均州檄陝西巡撫練  
國事駐商南遏其西北河南巡撫元默駐盧氏遏其東  
北湖廣巡撫唐暉駐南漳遏其東南奇瑜偕盧象昇由  
竹谿至平利之烏林關昌雨十數戰斬首一千七百五  
十餘級總兵官鄧玘及別將楊化麟楊世恩周任鳳楊  
正芳等分道擊賊于七家溝石泉壩康家坪等處凡斬  
首數千副將劉遷等搜竹谿平利之賊先後斬賊三千  
有奇禽其魁十餘人是時楚中賊且盡而賊之竄悉入  
漢南漢南之在秦也東至于洵陽白河平利又東至于  
興安石泉漢陰西至于西鄉洋縣漢中府又西至于沔

縣甯羌畧陽其地皆與楚蜀爲界各省大兵盡在楚蜀  
遂逼賊入漢南秦督洪承疇謂今數股之賊畢會于漢  
興而旁突于商雒秦事大可憂會承疇以甘肅邊警赴  
援而奇瑜見楚賊旣盡亟引兵而西謂賊不足平遣游  
擊唐通防漢中以護藩封參將賀人龍劉遷夏鎬扼畧  
陽沔縣防賊西遁副將楊正芳余世任扼褒城防賊北  
遁自督副將楊化麟柳國鎮等駐洋縣防賊東遁又檄  
練國事盧象昇元默各守要害截賊奔逸賊見官軍四  
集大懼悉遁入興安之車箱峽官軍四面圍之攷異據  
綏寇紀

畧烏林關之戰在六月十二日也家溝之戰在六月二  
十日石泉壩之戰在二十八日康家坪之戰在三十日

凡此皆勦楚賊也。漢南之賊懼勦遁入興安車箱峽富  
在是時而請降則七月間事以後始有出棧道西犯勝  
遊等七川縣事而史稿則書漢南降賊出棧道于五月  
又誤書艾萬年柳國鎮等戰沒于六月不知萬年等之  
沒乃在入年六月若七年則萬年在山西方邁疾告歸  
而國鎮是時方從陳奇瑜討楚蜀賊史稿誤入相差一  
年蓋莊烈無貨錄史稿所記月日干支多據野史不復  
攷證前後惟後修明史參之列傳悉行改正如車箱之  
困書于是夏則據傳中固困兩月語安得五月便出棧  
道耶三編類記于六月目中與明史本紀合今分書之

秋七月壬辰

大清兵入上方堡至宣府是時

大清兵征察罕還師見宣府邊城多頽壞乃興問罪之  
師初宣府巡撫沈棨遣使通款于

大清刑白馬定盟廷議責其專擅罷之于是遼東諸將

嚴備邊擾及

大清屬部戕害二十餘人張家口守臣多匿逋逃

大清責其負約至是分四路進兵自宣府趨應州略大同下得勝堡參將李全死之 乙未詔總兵官陳洪範守居庸巡撫保定丁魁楚等守紫荆雁門辛丑京師戒嚴 庚戌

大清兵攻保安知州閻生斗集吏民拒守城陷被執死之守備徐國泰判官李師聖吏目王本立訓導張文魁生員姚時中張師載俱同時死而國泰妻薛氏妾王氏闔門十三人皆殉焉是時沿邊城堡多失守

大清兵尋入靈邱知縣蔣秉采募兵堅守力屈衆潰投  
縋而死合門殉之守備于世奇把總陳彥武馬如豸典  
史張標教諭路登甫並戰沒又守備張修身常汝忠亦  
先後殉之遠近震懼 是月漢南賊出車箱峽先是賊

困峽中凡兩月諸渠魁高迎祥李自成張獻忠等咸在

焉張異據明史李自成傳車箱之困張獻忠奔商雒而

焉陳奇瑜傳則云諸賊渠高迎祥李自成張獻忠咸在

焉證之本紀獻忠奔商雒在二月乙酉陳奇瑜會勦之

前且奇瑜撫賊原奏內有入大王部萬三千餘人入大

王卽獻忠也故後修三編亦據峽四面峻立中亘四十  
奇瑜傳改正原編今據書之  
里賊誤入其中山上居民下石擊或投以炬火且疊石  
塞其口賊飛走俱絕乏食又大雨連旬弓矢盡脫馬乏

芻死者過半自成窘甚其黨顧君恩爲之謀曰吾輩萬里遠掠婦女輜重何不用之以餌羣帥可文降而狡焉以逞也自成善之乃以重寶賂奇瑜左右及諸將帥乞降奇瑜意輕賊有驕色遽許之悉籍其黨數萬姓名勞遣歸農每百人以一安撫官護之檄所過州縣具糗糧傳送令諸將無邀擊以撓撫事賊旣出棧道卽大譟叛殺安撫五十餘人于是勢復大熾八月戊辰詔總兵尤世威吳襄等援遼而以宣大總督張宗衡節制各鎮援兵總兵曹文詔偕宗衡先駐懷仁固守是月賊旣軼出車箱峽大掠所過州縣張應昌自清水追之敗績

賊遂連陷麟遊永壽等七州縣麟遊知縣董時和死之  
邑生員趙應璧奉母避賊賊至母投崖死應璧從之時  
賊之屯漢興者亦自畧陽來會關中大震賊初叛潛奔  
至鳳翔誘開城守者知其詐給以縋城上殺其先登者  
三十六人餘噪而去其犯寶雞者亦爲知縣李嘉彥所  
挫而奇瑜以其撓撫局劾嘉彥及鳳翔鄉官孫鵬等上  
怒逮嘉彥鵬及士民五十三人及賊勢日盛奇瑜悔失  
計乃委罪巡撫練國事上言漢南賊盡入棧道奇  
瑜檄止兵臣未知所撫實數及見奇瑜疏入大王部萬  
三千餘人蠟子塊部萬五百餘人張妙手部九千一百

餘人八大王又一部八千三百餘人臣不覺仰天長嘆夫一月撫強寇四萬餘盡從棧道入內地食飲何自出安得無剽掠且官軍防護一大帥止將三千人而一賊魁反擁萬餘衆安能受紀律耶賊皆藉口歸籍然延安州縣驟增四萬餘人安集何所合諸征勦兵不滿二萬而降賊踰四萬豈內地兵力所能支宜其連陷名城而不可救也若咎臣不堵勦則先有止兵檄矣若云賊已受撫因誤殺所致然則未誤殺之先何爲破麟遊永壽爲今之計惟急調大軍致討若仍以願回原籍禁兵勿勦三秦之禍未知所終極矣疏入事已不可爲遂逮國

事下獄 吏部尚書李長庚罷長庚不植黨援與溫體仁不甚合至是以推郎中王茂學爲真定知府上不允復推爲順德知府上怒責以欺蒙竝追咎冠帶監生投職事責令回奏奏上斥爲民時左都御史張延登亦免體仁欲援逆案以攻東林會吏部缺陰使張捷舉逆案呂純如以嘗上言者大譁上亦甚惡之捷氣沮體仁遂不敢言乃薦謝陞唐世濟遂擢陞爲吏部尚書世濟左都御史 閏月甲申賊陷隆德先是洪承疇聞秦警自甘鎮還賊之西犯者陷澄城圍郟陽會承疇兵至解圍去轉掠平涼邠州進攻隆德破其城殺知縣費彥芳鄉

官松江通判楊泰初與子生員善俱赴井死生員楊泰  
運爲賊執罵不絕口斷舌死賊遂薄靜海州回原參政  
陸夢龍率游擊賀奇勲都司石崇德禦之賊初不滿千  
已而大熾夢龍所將止三百餘人賊圍之數重矢石如  
雨突圍不得出二將抱夢龍泣夢龍揮之曰何作此婦  
孺態大呼奮擊手馘數人與二將俱戰死夢龍卽治挺  
擊案中也攷異陸德之昭明史本紀及夢龍本傳皆  
書之閏八月諸書以爲八月者脫閏字而  
史稿誤入之六年八月戊子相差一年蓋誤據明史  
紀事本末也是年新歷閏六月明史據大統歷書之  
丁亥

大清兵克萬全左衛

攷異據明史稿閏月丁酉攻萬全  
左衛丁亥破之守備常如松指揮

杜詩秦之英賊沒按此三人三編及時曹文詔等皆不  
殉節錄皆不載未知何据附識于此敢戰代王母楊太妃命總督張宗衡等通款于

大清庚寅班師出塞于是宗衡文詔及巡撫胡沾恩總  
兵張全昌等竝論罪遣戍山西巡撫吳甡請留文詔全  
昌勦晉賊自贖報可兵部議令文詔馳勦河南賊甡復  
抗疏爭請先平晉賊後入豫上不許而文詔感甡知竟  
取道太原爲甡所留時山西降賊王剛王之臣通天柱  
等已爲前撫戴君恩所斬獨賀宗漢劉浩然王加計攷  
明史文詔傳作高猶擁衆自恣剽掠城邑垣曲典史秦  
加計今据三編宗恩黎城布衣李養裕先後以督鄉勇捍賊死甡陽爲

招撫密令參將猛如虎虎大威劉光祚等圍之于是山西盜悉平 壬寅李自成圍參將賀人龍于隴州時自成率衆圍隴州人龍馳兵赴援賊環攻之自成以人龍同里閉遣其將高傑遺書令叛人龍不報圍守兩月洪承疇遣總兵左光先救至圍始解 九月庚申益甲厥災 甲戌以賊悉聚陝西詔河南兵入潼華湖廣兵入商雒四川兵由興漢山西兵出蒲州韓城共討賊 冬十月庚戌湖廣兵覆于雒南副總兵楊正芳及部將張上達死之 是月工部尙書周士樸罷時中官張夔憲監戶工二部出納士樸恥之數與齟齬夔憲譖于上士

樸疏對辭直上無以難至是以遂平公主塋價引例不合爲駙馬都尉齊贊元所劾遂削籍踰月以劉遵憲代之十一月庚辰逮陳奇瑜下獄奇瑜以車箱縱賊給事中顧國寶御史傅永淳交章劾其受賊賄詔錦衣官逮訊而以洪承疇代之時賊已蔓延不可撲滅首輔溫體仁謂山西巡撫吳牲曰流賊癘疥疾不足憂也奇瑜罪當死以體仁庇之未幾僅謫戍邊十二月賊自陝西出犯河南先是賊十餘萬往來關中連營輒百餘里別賊萬餘屯雒南閩鄉蹂躪郡邑數十諸將先後以死事著者總兵殷體信沒于陣游擊丁孔應被執不屈死

指揮李學牧陷賊中與王風木等謀舉義事泄北面再拜受刃死守備史大勳率兵逐賊被執爲所殺昌平鎮將凌元機胡良翰隸湯九州部下賊屯閩鄉九州遣二人搜山敗沒花馬池營千總蔡應昌血戰死其以長吏殉城死者甘泉知縣蒲來舉求救于守備孫守法不應城破手刃數賊死之崇信知縣龐瑜知賊必至而縣中止貧戶百餘乃率士民築土城以守流涕誓死會天大雨土城盡圯賊大至瑜遣家人賁印送上官端坐堂上賊猝令跪瑜罵曰賊奴敢辱官長賊拔刀脅之罵益厲執至野外剖心裂腹而死山陽知縣董三謨與父嗣成

第三元俱殉難妻李氏亦攜子女偕死涇州知州婁琇城陷死麟遊再陷知縣呂鳴世初至賊不忍加害絕食六日死一時士民仗義者涇陽布衣王祚以捍賊死耀州生員宋緒湯以詈賊死方賊之出棧道也聞洪承疇將合諸路兵進勦賊渠高迎祥李自成等遂竄入終南會承疇赴甘肅賊又出終南分陷關隴比承疇還引兵而東賊乃悉衆東奔遂陷陳州靈寶集宛洛間河南復震賊每營數萬兵更番進皆因糧宿飽官軍寡備饋餉或不繼賊介馬馳一日夜數百里官軍步多騎少行數十里輒疲乏以故多畏賊時左良玉扼新安澠池陳治

邦駐汝州陳允福扼南陽皆坐甲自保良玉前在懷慶  
與督撫議不合因是生心緩追又多收降寇以自重督  
撫檄調不時應命漸有跋扈端實無意殺賊而賊聞良  
玉且至移壁梅山漆水間其別部掃地王等復趨江北  
攻英山陷之又焚霍山三編實據湖廣通志有知府  
簡而可者亦于是年殉節死其  
地方月日無攷  
附識之能觀類是冬無雪 是歲京師饑御史龔廷  
獻繪飢民圖上之

八年春正月乙卯梅山漆水之賊陷上蔡丁巳屠汜水  
陷滎陽戊午陷固始 己未詔總督洪承疇出潼關討  
河南賊與山東巡撫朱大典協勦賊聞承疇將出關大

會羣賊于滎陽老回回曹操革裏眼左金玉改世王射  
塌天橫天王混十萬過天星九條龍順天王及高迎祥  
張獻忠共十三家七十二營議敵官軍未決李自成進  
曰匹夫猶奮況十萬衆乎官兵無能爲也宜分定所向  
利鈍聽之天皆曰善乃議革裏眼左金玉當川湖兵混  
天王混十萬當陝兵過天星扼河上綴河南兵迎祥獻  
忠及自成畧東方老回回九條龍往來策應陝兵銳益  
以射塌天改世王所破城邑子女玉帛惟均衆皆如約  
始迎祥與獻忠並起比肩自成乃迎祥支黨不敢與獻  
忠偶及是遂相頡頏與俱東掠 辛酉賊自固始抵霍

邱陷其城縣丞張有俊死之時霍邱知縣弃城遁教諭倪可大督民壯拒戰以奇策斬賊首數百分守城北賊以礮攻陷南門被執齧指血噴賊賊怒被礮死妻女皆自縊僕倪表亦殉焉訓導何炳若鄉官戴廷對田旣庭舉人王毓貞張燦恒皆城陷死之是日張獻忠攻潁州知州尹夢鰲通判趙士寬方謁上官于鳳陽驟聞賊至立馳還賊已抵城下率民壯固守城北有高樓可瞰城中諸生劉廷傳請先據之夢鰲以爲然而廷傳所統皆市人不可用賊攻樓且鑿城頽數丈城上人皆走不可止夢鰲持大刀獨當城壞處殺賊十餘人身被數刃賊

衆畢登遂投城下烏龍潭弟姪七人皆從死城既陷士  
寬率衆巷戰力竭亦赴水死妻李氏攜三女登樓自焚  
僕王丹亦罵賊死潁州衛在州治西北隅賊分攻衛城  
指揮李從師王廷俊千戶孫升田三震百戶羅元慶田  
得民王之麟前所百戶汪檀俱乘城戰死廷傳及衛經  
歷胡士定竝以罵賊死廷傳爲故布政使九光從子九  
光子廷石分守西城中賊刃未殊口授友人方畧令繕  
書上當事旋卒致仕尙書張鶴鳴與其弟故雲南參政  
鶴騰被賊執倒懸鶴鳴于樹皆罵不絕口死鶴鳴子大  
同闔門皆遇害中書舍人田之穎光祿寺署正李生白

署丞李元白黃岩知縣劉道遠會甯知縣楊南同殉城  
死其它官紳士庶死難者共一百三人城中婦人殉節  
者二十七人烈女八人一時忠烈稱獨盛城破後亦無  
一人向賊乞憐者賊怒遂屠之潁霍既陷賊攻壽州故

御史方震孺率鄉兵城守不克遂焚正陽關而去

三編  
質實

死難之官紳士庶名見史乘者為夔州府訓導丁嘉遇  
候選經歷汪邦弼舉人白精忠郭三杰貢生李茂叢楊  
得坤甯儉生員韓光祖檀之槐李維紀王致志張維黃  
劉大濟田大生閻于階弟于邦王國泰元鳳翔卞文斗  
王乾亨丁嘉運劉斌姚克智丁崇先郭之英姚同寅尙  
日暄陳純李孕生王致和申華郭之豪田之萃郭璋馬  
負圖錢人璋盧元貞馬宋國馬柱國韓中佐楊于世王  
啟昌邢元錫熊協慶王維新李汝廷盧傳世喻天叙楊  
士貞郭之產郭霽賀嘉貞閻慎言監生王文煥田之蔚  
田之茂田之尹武舉尙日躋李承訓醫官張濟民禮生

孔道隆儒士田之蕙王振先布衣鹿勁元中元嚴克長  
王尙廉元旋祁標王公枋張肅範王之幹趙謙祁濩潘  
守仁汪茂椿張思明黃國王九成王印王聘汝陳繼信  
並人祠韓光祖母李氏妻武氏偕一妹二女赴井死妾  
李氏方有娠被剖腹死次子定策孫日贖皆罵賊死檀  
之槐護母柩不去被磔死李維紀妻趙氏及子女十八  
人投井死王致志  
妻唐氏同殉節  
丙寅賊陷鳳陽焚皇陵樓殿先是

南京兵部尙書呂維祺懼賊南下請防護鳳陽陵寢不  
報給事中孫晉亦以爲憂言于兵部尙書張鳳翼鳳翼  
曰賊起西北不食稻米賊馬不飼江南草公南人何憂  
遂不設備賊漸逼江北鳳翼乃請敕漕運都御史楊一  
鵬移填鳳陽溫體仁格其議鳳翼亦不能再請事益急  
給事中許譽卿請速調五千人守鳳陽而賊已自壽州

分部來犯鳳陽故無城留守朱國相率指揮袁瑞徵呂承蔭郭希聖張鵬翼周時望李郁岳光祚千戶陳宏祖陳其忠金龍化等以兵三千逆戰上黨頗有斬獲頃之賊數萬至矢集如蝟官軍敗國相自刎死餘皆陣沒一鵬在淮安遠不及救賊遂燔皇陵大肆殺掠千戶陳永齡百戶盛可學死之賊犯衛城衛經歷胡尙綵獨擊却之賊復至被執不屈與府照磨蕭懋烈等凡死者四十餘人推官萬文英方卧病賊索之子元亨年十六泣語父曰兒不得復事親矣出門呼曰若索官何爲我卽官也賊繫之極口大罵斷脛死文英獲免

攷異史稿輯覽皆載鳳陽之陷

知府顏容暄推官萬文英死之容暄之死紀事本末言其囚服匿獄中賊縱囚獲之杖于堂下殺之據此則容暄之不入死事三編剛之宜也若文英之死據三編實言其子胥官代死文英得免似文英亦未死而死者乃其子萬元亨也今據三編書之附識其異于此○又按北畧已言文英遇害在前何以又云獲免或免後復死也此舉人蔣思宸投縋死布衣陳自修繞父柩哀鳴亦一說

死凡死者又六十餘人城既陷公私邸舍被焚者二萬餘間光燭百里賊渠張幟自稱古元真龍皇帝合樂大飲張獻忠李自成皆在焉恣掠三日壬申徐州援兵至鳳陽張李二賊已分道走先是自成飲于皇陵從獻忠求小閣善鼓吹者獻忠不予自成怒偕高迎祥西趨歸德謀復入關獻忠獨東攻廬州州民乘墉捍賊有張

四哲者偕弟四美四奇奮力迎戰敗沒州城堅賊百計  
攻之不克去攻舒城知縣章可試塞三門開西門誘賊  
入陷于坑犇潰死者千人賊乃去甲戌攻巢縣知縣嚴  
覺闖門死之戊寅圍廬江士民具財帛求免賊僞許之  
俄襲陷其城維時官吏皆避賊走匿里居故山西參政  
盧謙服命服坐中門賊至欲屈之罵曰吾朝廷憲臣肯  
爲賊屈邪鼠輩滅在卽安敢無禮賊怒殺之投屍于池  
池水盡赤舉人張受畢伊周皆先後殉焉己卯賊攻無  
爲州知州張化樞死之 是月禮部尙書李康先罷踰  
月以黃士俊代之 二月壬午張獻忠陷潛山知縣趙

士彥死之連陷太湖宿松皆屠其城太湖知縣金應元據城東大濠奸人導賊渡濠爲所執斫未殊自經死守備趙蔭被執不屈死趙繼春與賊戰于洪家嶺以無援死訓導扈永甯亦死之宿松生員劉之暄請代父死賊釋其父生員萬民望請代母死賊釋其母生員袁師臯見賊欲殺其母力與相持受數刃死生員柴維煥與三子同遇害布衣陳昌言夏時行石思行皆先後殉賊所過太和霍山六安亳州悉被殘破太和則生員秦培篤與妻王氏偕死生員秦思允被執挾之攻城呼告城上曰賊以牛皮昌車避矢石所懼獨火耳賊殺之城上人

投薪焚賊車城遂獲全霍山則教諭龔元祥訓導姚允  
恭以知縣先遁督民兵固守力屈元祥與其子炳衡俱  
被殺允恭亦死之六安則生員梅國秀亳州則布衣李  
心惟李猶龍皆以守親柩遇害如龍爲猶龍從弟賊執  
其母奮力擊之爲所殺心惟子果亦從死 乙酉張獻  
忠羅汝才別部分陷羅田知縣梁志仁死之志仁保定  
侯梁銘之裔也羅田界湖廣江北之交志仁日夕儆備  
羅汝才以其長者不忍加兵有獄囚江猶龍思脫死遣  
人導汝才別校來攻志仁持長矛巷戰殺六賊力屈被  
繫罵賊支解死妻唐氏亦被害教諭吳鳳來訓導盧大

受典史單思仁皆死之汝才在英山聞之馳至爲斬其  
別校時羅田之賊復分陷徐州及虞城商邱汝甯真陽  
新蔡徐州則知州陳桂棟虞城則生員朱鼎延商邱則  
舉人賈遂李明開武舉史懋明汝甯則江陵生員劉楷  
真陽則知縣王信新蔡則知縣黃信皆死之而王信之  
死以罵賊斷頭剖腹爲尤慘云致異是月張獻忠東攻廬州不克遂連陷潛山  
太湖宿松等縣故攻羅田者皆以爲獻忠之別部而据  
三編質實所載則羅汝才之別部也按是時汝才在英  
山獻忠在潛山太湖一帶皆與羅田近賊流掠無定向  
今兩書之新蔡知縣王信三編不入正文但云真陽知  
縣王信死之而于質實中附注云時又有一王信官新  
蔡知縣亦于是年殉節然史稿書新蔡知縣黃信今据  
書之俟攷又宿松之陷北畧載指揮包文達義士石電  
以援宿松戰沒並詳記其死事之烈而三編入之十年

附識  
于此

甲午以皇陵失事逮總督漕運尙書楊一鵬下

獄先是上聞皇陵之變素服避殿祭告郊社哭于二祖  
列宗之廟遣駙馬都尉王昺太康伯張國紀行祭慰禮  
侍郎朱大典巡撫鳳陽修復陵寢逮一鵬竝巡按御史  
吳振纓一鵬論死振纓遣戍 丁酉總兵鄧玘敗賊于  
羅山初賊大入河南命玘援勦至是賊陷鳳陽命玘自  
黃州速援安慶及桐城被圍玘竟不至羅山之賊乃敗  
賊也于是御史錢守廉劾玘殺良昌功命總督洪承疇  
覈實以聞 是月賊既蹂躪江北復流擾于靳黃汝甯  
歸德之間圍桐城者數月應天巡撫張國維率副將許

自強東西奔擊解桐城圍遣守備朱士允趨潛山把總張其威趨太湖士允戰沒自強遇賊宿松殺傷相當安慶山民桀石以投賊賊多死乃趨英霍走麻城以去流賊之犯鳳陽也給事中許譽卿痛憤直發本兵張鳳翼固位失事及首輔溫體仁玩寇速禍罪畧言賊在秦晉時早設總督遏其渡河禍止西北一隅耳乃侍郎彭汝楠避不肯行及賊入楚豫人言交攻然後不得已而議設之侍郎汪慶百又避不行乃推極邊之陳奇瑜鞭長莫及釀成今日之禍非樞臣之固位失事乎流寇發難已久樞臣因東南震鄰始有淮撫操江移鎮之疏識

者已恨其晚及閣臣擬旨則曰不必移鎮臣觀各地稍有兵力賊卽不敢輕犯鳳陽何地使巡撫早移豈有今日今撫臣以不必移鎮爲詞樞臣以曾請移鎮藉口則輔臣欲辭玩寇之罪其可得哉上以譽卿苛論妄言切責之 三月辛亥朔督師洪承疇次汝甯先是上聞鳳陵之變晉承疇兵部尙書賜上方劍令集諸路兵駐楚豫適中之地至是承疇至汝甯分遣諸將隨賊所在邀擊于是賀人龍往鳳陽鄧玘往麻黃左良玉往南陽時曹文詔張應昌自晉中來未至客有謂督師者曰公中權無帥卽緩急云何承疇曰吾以俟文詔至也賊見大

軍至復折而入秦。癸丑張獻忠陷麻城壬戌殲楚賊陷甯羌州時麻黃之賊走棗及襄復由鄖陽故道入秦而賊之陷甯羌者由沔縣畧陽轉入臨鞏于是秦賊復熾。丁卯督師次信陽曹文詔至軍令擊賊于隨州。

戊寅總兵官曹文詔冒雨逐賊于隨州斬首三百八十

級。攷異明史本紀書文詔敗賊隨州于二月證之文詔傳文詔以三月會洪承疇于信陽承疇大喜卽令擊

賊于隨州又据緩寇紀畧承疇抵信陽在三月十七日隨州擊賊在三月二十八日是月辛亥朔十七日丁卯

二十入日戊寅明史月日干支大都與紀畧合紀中有二月無三月疑是月二字卽三月二字之誤。夏

四月丁亥游擊鄭芝龍合廣東兵擊海盜劉香于田尾。遠洋參政洪雲蒸陷賊中踰二年至是香脅雲蒸止兵。

雲蒸大呼曰我矢死報國急擊勿失遂遇害香勢蹙自  
焚溺死被執之康承祖等脫還賊黨千餘人詣浙江歸  
欵海盜盡平 辛卯洪承疇會師于汝州是時張獻忠

由麻城入陝與高迎祥李自成復合承疇偵賊盡入關  
中議還顧根本乃大會諸將定分地擊賊命鄧玘尤翟

文張應昌許成名駐樊城防漢江左良玉湯九州控吳

村瓦屋

緩寇紀畧內鄉  
浙水之要道也

尤世威陳永福徐來朝分駐永

甯盧氏山中以扼雒南朱陽之險承疇親統大軍俟文  
詔隨州至偕入關進勦 乙巳川兵變于樊城總兵鄧

玘遇其下寡恩多尅餉至是奉調赴樊城標將王允成

家丁鼓譟殺其二僕玘懼登樓越牆誤墮火巷被焚死玘由小校大小數百戰所向多捷以久戍觖望恣其下淫掠輔臣王應熊以鄉里庇之玘益無所憚其死也人以爲佚罰云是時徐來朝不肯入山兵亦譁于盧氏

丙午洪承疇西還駐師于靈寶曹文詔自南陽亦至焉先是承疇聞樊城之變急檄副將秦翼明代統玘軍以奏限六月平賊期且迫遂率賀人龍張全昌等西行約文詔會商州此次靈寶文詔至承疇以賊黨屯商雒聞官兵大集必先走漢中而大軍由潼關入反在賊後乃令文詔由閬鄉取山徑至雒南商州直搗賊巢復從山

陽鎮安洵陽馳入漢中過其犇軼曰此行也道路回遠將軍甚勞苦吾集關中兵以待將軍拊其背而遣之文詔躍馬去 五月甲寅總兵官曹文詔參將曹變蛟大敗商州之賊文詔昌雨至商州賊去城三十里營火滿山夜半率變蛟及守備鼎蛟都司白廣恩等敗賊深林中明日追至金嶺川賊據險以千騎逆戰變蛟大呼陷陣諸軍並進賊敗走變蛟勇冠三軍賊中聞大小曹將軍名皆怖懼是時督師洪承疇次涇陽賊聞承疇至奔醴泉興平承疇折而西夜渡渭赴新安議討商雒賊而商雒賊老回回等以是日直薄西安去大軍五十里承

疇遣賀人龍過其南劉成功王永祥等過其北張全昌亦自咸陽截擊遠出與平之東賊以此不敢南渡盡奔武功扶風其夜賊從扶風之教坊塘渡河走郿承疇恐其東奔又渡渭追之丙辰賀人龍劉成功等大敗郿縣之賊追奔三十里明日抵盩厔 乙亥內閣吳宗達罷溫體仁當政宗達能爲之下在閣六年交驩無間至是以衰老乞歸 是月洪承疇追賊至盩厔郿二境上據鞍顧盼以鞭指謂諸將曰此地南距山北阻渭中三十餘里賊出秦入秦之要口非得專將守之不可乃勞饗將士遣游擊王永祥駐潼關馬獻圖駐藍田都司高崇

選李世春駐紮屋監軍道劉三顧節制之部署甫定而前犯西安諸大賊闖王八大王等圍鳳翔過天星蠟子塊等圍平涼報至承疇自紮屋郿縣渡河抵岐山向平涼是時賊分三道東往涇州鎮原甯州而鳳翔之賊西趨涇陽隴州官軍分道追擊曹文詔自漢中以其兵至賊大勢盡向靜甯秦安清水秦州間衆且二十萬承疇以文詔所部合張全昌張外嘉軍止六千衆寡不敵乃告急于朝請益兵而勢已不及 六月己丑官軍遇賊于亂馬川敗績前鋒中軍劉宏烈被執死之壬辰副總兵艾萬年柳國鎮劉成功游擊王錫命等以三千人擊

李自成于甯州之襄樂頗有斬獲俄賊伏發被圍萬年國鎮死之失亾千餘人成功錫命俱重創 己亥總兵

張全昌副總兵賀人龍以三千人至清水之張家川斬

賊百六十餘級又明日追賊失利都司田應龍張應春

死攷異明史賀人龍傳但云田應龍等三編增入張應龍今據綏寇紀畧作應春賊運勝益驕

欲犯西安涇陽三原洪承疇在邠州憂之不知所出總

兵官曹文詔聞艾萬年死拔刀斫地曠目大罵曰鼠子

敢爾卽詣承疇請行承疇喜曰非將軍不足辦此賊顧

吾兵已分無可策應者將軍行吾將由涇陽赴涇化以

爲將軍後勁文詔乃以三千人自甯州往丙午遇賊于

真甯之湫頭鎮參將曹變蛟爲前鋒直前搏戰斬賊五百餘級乘勝窮追三十里文詔自率步卒殿後賊伏數萬騎四起合圍飛矢蝟集賊不知爲文詔也有小卒縛急大呼曰將軍救我賊中叛卒識之悉賊曰此曹總兵也賊喜圍益急文詔左右跳盪手擊賊數十人轉鬥數里力不支拔刀自刎死游擊平安以下死者二十餘人賊乘勝轉掠火照西安城中承疇力遮之涇陽三原間賊不得過文詔忠勇冠時稱良將第一其死也賊中交相慶而紀其事者以爲真甯恨云上聞文詔死震悼賜祭葬世蔭有司建祠祀之

攷異自正月洪承疇出潼關以下悉據明史本紀月日而

綏寇紀畧以日數紀明史易以千支無不脗合又參之列傳月分悉符較之史稿所載襍據紀事本末北畧等書出入矛盾乃知後修明史攷證詳核也今參諸傳及紀畧書之爲得其實云

吳偉業曰曹文詔與左良玉竝起文詔一蹙致命而良玉累敗復振卒至封侯何歟良玉擁兵觀望又縱其下大掠以充軍資招徠降衆張形勢以成跋扈要朝廷濫爵賞此豈文詔所欲同者耶自其隸馬世龍麾下爲軍鋒入秦收王嘉允殲點燈子西濠銅川橋一戰手所摧破者數萬花園寺疾馳中伏瀕于死者幾矣不知所爲逗遛也過河數十戰功高賞薄遭譴洵被朝受命又辦嚴追賊于隨州商州累晝夜不解

甲不知所爲怨望也生平惟定邊有譁兵之變潰去  
二百人撫之卽定部將如馮舉張天祿賈呈芳趙國  
佐等推腹心共功名常稱其師行有紀所過秋毫無  
犯白廣恩之降也文詔令變蛟共游處廣恩見制府  
不肯解所佩刀制府疑欲殺之文詔曰殺廣恩賊心  
益危且廣恩才可用願以身保之其收攬駕馭豈出  
良玉下哉朝廷不付以重兵多其賜予取平賊將軍  
印佩之顧謂起自徒中立責後效制府分兵守險挈  
瓶口而壅之醜徒致疾于我文詔憤王誅之不加痛  
同事之摧敗猛氣空涌遂以其屬馳賊軍而死夫李

廣北平公孫爲泣賈復傷劓光武大驚國家之干曹  
將軍非徒不能加之膝也又從而摧抑之迫促之身  
歿之後下詔褒忠惓惓于金嶺川之一捷雖復周處  
墳高霽雲廟食于國事奚補之有曹變蛟收散卒復  
家仇孫策之還領父兵灌夫之直走吳壁忠勇慷慨  
有叔父之風文詔有弟曰文耀同敗河曲陣殞忻州  
變蛟松山不食而死一門沒于王事君子聞鼓鼙而  
思將帥若曹氏者可弗書乎

秋七月甲戌以少詹事文震孟刑部侍郎張至發俱禮  
部侍郎兼東閣大學士預機務震孟旣歸以五年復召

卽家擢右庶子既至尋進少詹事直講筵先是鳳陽之變震孟歷陳致亂之源謂當事諸臣不能憂國奉公一統之朝強分畛域又言陛下宜行撫綏實政先收人心以遏寇盜徐議濬財之源毋徒竭澤而漁語多切中時弊至是上將增置閣臣以翰林不習時務思用他官參之召廷臣數十人各授一疏令票擬震孟引疾不與至發所擬獨當上意特命至發與震孟並入閣至發以縣令起家累擢居政府蓋異數也 丙子總兵尤世威敗績于朱陽關關卽古函谷也時賊爲洪承疇所遮將由藍田走盧氏世威時奉洪承疇分地令與參將徐來朝

分駐永甯盧氏山中以扼雒南蘭草川朱陽關之險張  
獻忠欲走盧氏扼于世威仍入商雒山中來朝所部初  
以不肯入山大譟至是賊至來朝遁一軍盡沒世威軍  
暴露久大疫與賊戰失利敗走賊遂突入朱陽關殺裨  
將徐來臣分十三營東犯河南復震惟高迎祥李自成  
仍留陝西 八月壬午李自成陷咸陽殺知縣趙躋昌  
又陷永壽殺知縣薄匡宇 壬辰詔撤監視總理中官  
惟京營及關甯高起潛如故 辛丑命盧象昇總理直  
隸河南山東湖廣四川軍務時廷議以賊勢益張洪承  
疇一人不能兼顧乃擢象昇總理五省與承疇分轄承

時督關中兵辦西北象昇督關外兵辦東南尋進象昇  
兵部侍郎加總督山西陝西賜尙方劍 是月賊入河  
南攻中牟尋抵開封入其邪俄遁去攻長葛郟城扶溝  
不克遂攻鄆陵爲故大司馬梁廷棟邑里告急于左良  
玉趨兵赴援敗之于彭祖店 九月辛亥總督洪承疇  
敗賊于渭南先是高迎祥李自成在關中分道出犯迎  
祥畧武功扶風以西自成畧富平三原以東承疇遣將  
追自成小捷至醴泉賊將高傑通于自成妻邢氏懼事  
泄被害挾之來降承疇復身追自成大戰渭南臨潼自  
成大敗東走曹文詔旣沒變蛟收潰卒復成一軍承疇

薦爲副總兵置麾下至是與高傑破賊關山鎮遂北三十餘里又追高迎祥與戰于鳳翔之官亭敗之又與左光先敗迎祥于乾州迎祥中箭走迎祥屢敗東逾華陰南原絕嶺偕自成出朱陽關與張獻忠合 壬戌官軍敗績于沈邱賊自鄆陵敗後將欲趨西安洪承疇亟檄總兵張全昌副將曹變蛟先赴渭華格其前覩督軍尾其後賊不得西復奔而南承疇又命全昌追擊至穎州蠟子塊攻沈邱全昌與之戰敗遂被執賊挾全昌攻斬黃全昌因代賊求撫總督盧象昇不許責全昌喪師辱國曰賊果欲降可滅其黨示信賊不聽命久之全昌脫

歸 壬申王應熊罷應熊爲楊一鵬所取士初一鵬奏  
鳳陵失事應熊在閣懼上震怒留其疏未上及報恢復  
同奏之遂擬旨令一鵬戴罪而上以皇陵遭燬非尋常  
失事乃逮一鵬論死于是給事中范淑泰等爭劾應熊  
朋比誤國言一鵬恢復疏以正月二十七日核察失事  
情形疏以正月二十八日天下有未失事先恢復者哉  
應熊改填日月欺誑之罪難辭且劾其他受賄事上眷  
應熊厚不聽應熊亦屢疏辯謂座主門生誼不容薄不  
敢辭朋比之名票擬實臣起草不敢辭誤國之罪言官  
益憤給事中何楷屢疏糾之最後復疏言故事奏章非

發鈔外人無由聞非奉旨邸報不許鈔傳臣疏六月初  
十日上十四日始奉明旨應熊乃于十三日奏辯旨尙  
未下應熊何由知臣不解者一旦旨下必由六科鈔發  
臣疏十四日下而百戶趙光修先送錦衣堂上官則疏  
可不由科鈔矣臣不解者二應熊始懼具疏引罪詔下  
其家人及直日中書于獄獄具家人戍邊中書貶二秩  
應熊乃屢疏乞休去乘傳賜道里費行人護送上亦知  
應熊不協人望特已所拔擢不欲以人言去也 是月  
豫賊自嵩華趨郊禹攻密縣知縣苗之庭敗之賊解圍  
去總兵左良玉躡賊于郊之神屋山賊連營數十里番

休更戰良玉收其卒而止賊遂入潁州時江北之賊與之合席灣守將朱子鳳領兵五百人遇賊于懷遠之龍岡集力戰死之豫賊自潁州將渡淮豫撫陳必謙以潁上逼近鳳泗祖陵遣陳永福出境二百餘里大敗之賊不得濟遂攻信陽州官兵敗之于北關及中山鋪百戶葉正芳力戰被執罵賊死賊再攻密縣知縣苗之庭再破之城下賊攻圍三晝夜之庭乘堙殺賊三百餘人會左良玉自邲援之乃去 是秋秦賊破扶風知縣王國訓偕主簿夏建忠典史陳紹南教諭張宏綱訓導陳縉率生員王守庠守德等嬰城固守閱兩月外援不至城

陷國訓罵賊與建忠等俱不屈死

攷異王國訓之死後寇紀畧書之九月蓋

是時秦賊尙未出關也据明史忠義傳扶風之守閔雨月始陷則是以七月攻九月陷故傳中書之是秋今從

之逮總理河道侍郎劉榮嗣下獄榮嗣方修建義決

口工成賜銀幣至是得罪初榮嗣以駱馬湖運道潰淤剗挽河之議起宿遷至徐州別鑿新河分黃水注其中以通漕運計工二百餘里金錢五十萬而其所鑿邳州上下悉黃河故道濬尺許其下皆沙挑掘成河經宿沙落河坎復平如此者數四迨引黃水入其中波流迅急沙隨水下牽淤淺不可以舟及漕舟將至而駱馬湖之潰決適平舟人皆不願由新河榮嗣自往督之欲繩以

軍法有人者輒苦淤淺弁卒多怨巡漕御史倪于義劾其欺罔誤工南京給事中曹景參復重劾之逮問坐贓父子皆瘐死郎中胡璉分工獨多亦坐死其後駱馬湖復潰舟行新河無不思榮嗣功者當是時河患日棘而上又重法懲下李若星以修濬不力罷官朱光祚以建義蘇嘴決口逮繫六年之中河臣三易給事中王家彥嘗切言之光祚亦竟瘐死冬十月庚辰上以流賊久不滅下詔罪已且諭曰今調勅兵留新餉拯救元元在此一舉惟行間文武吏士勞苦飢寒深廛朕念念其風餐露宿朕不忍安卧深宮飲水食蠶朕不忍獨享甘旨

披堅執銳朕不忍獨衣文繡自是月初三日始避居武英殿減膳撤樂非典禮惟以青衣從事誓與我行間文武吏士甘苦共之廷臣其各修愆淬厲以回天心而救民命 丙戌戶部尙書侯恂請嚴催新舊逋賦從之初鳳陵之變侍讀倪元璐言盜賊震及祖陵陛下下罪己之詔布告天下然此非徒空言也今民最苦無若催科請自崇禎七年以前一應逋負悉與蠲除斷自八年督徵有司考成亦少寬之東南雜擾累無紀如絹布絲棉顏料漆油之類悉可改從折色此二者於下誠益於上無損民之脫此猶湯火也至發弊而遠追數十年之

事糾章一上蔓延不休扳賊而旁及數千里之人部文  
一下宛號四徹誰有以民間此苦告之陛下者乎及今  
不圖日蔓一日必至無地非兵無民非賊刀劍多於牛  
犢阡陌決爲戰場陛下亦安得執空版而問諸燐燹之  
區哉上是之時給事中劉含輝亦乞蠲陝西八年以上  
逋租然迄不行 是月豫賊江北賊共攻蘄黃黃梅之  
賊由宿松入潛太應天巡撫張國維檄副將許自強救  
皖操江御史王道直以水軍爲遊邏時盧象昇總東南  
軍改史可法副使分巡安慶池州監江北諸軍守潛山  
之天堂寨豫賊掃地王等別自霍山趨英山分掠宿松

太湖間是時自朱陽關出者皆集靈寶會遼東總兵祖寬勒兵至豫豫撫陳必謙推官湯開遠引之同左良玉兵勦賊于靈寶六十里之澗口焦村敗之張獻忠聯三大營俟秦賊至適高迎祥李自成東走出朱陽關獻忠與之合凡擁衆三十萬悉聚于闕鄉靈寶塵埃漲天絡驛百里寬禦之靈寶西良玉禦之靈寶東皆不支于是自成遂薄陝州 河南府監紀推官湯開遠上疏言皇上于撫臣則用懲劄一法于鎮臣則用優遇一法所少者分別之一法耳如撫臣竝失事也有怯縮不前有抗擅自命有兵食充而才力不及有才力濟而兵食艱難

有在事而料事無聞有初任而綢繆不及有將士用命而調度失宜有布置已周而左右違指此可概以嚴譴置之乎武臣竝專閫也有紀律頗嚴有淫掠無忌有爭先赴敵有觀望逗遛有養士費財有廢削軍賜有計功索賞有虛級偽張此可概以寬假容之乎聖諭以諸臣中未始無才力乃甯甘褫革而不自做不敢做爲恨臣思其故其不自做者則以做亦罪不做亦罪也其不敢做者則以不做之罪猶輕而做之罪更重也皇上宜與諸臣更始寬文法厚責成反覆于功罪之間必求其分別既已分別而不槩收亦分別而不槩棄則人心勸事

功立疏聞奉嚴旨責令回話開遠再奏疏云臣聞帝王  
磨厲天下止有賞罰然無分別之賞賞不足勸無分別  
之罰罰不足懲臣不敢漫引姑舉事關辦寇者卽秦晉  
本無賊而致有賊本可撲滅之賊而致成不可撲滅之  
賊如撫臣胡廷晏劉廣生仙克謹宋統殷許鼎臣數臣  
者何以當日處分視後皆極輕如練國事元嚳承其極  
敝掣肘之畫空拳之搏雖無救燎原其勤勞可錄何以  
處分較前更重臣歷數近日皇上爲辦寇而誅督臣逮  
督臣者一逮撫臣褫撫臣者二按臣亦與並論而并逮  
矣道府州縣則不可勝計試問前後在事諸帥臣有一

誅且逮者乎不特帥臣卽偏裨有一誅且逮者乎臣任中州再以中州一二事陳之按臣曾倜當舊撫艱去力障寇鋒捐贖八千金濟師料理防河苦心拮据值元嘿蒞任覃懷方叱馭歸汝未嘗纖毫失事竟從逮配將來無冒做敢做之按臣矣道臣祝萬齡在河北經營兵食寢食俱廢疽廢于背猶履戎行而致削籍將來無肯做敢做之司道矣宜陽令史宏謨寇從澠池突至偵備有素孤城得全聞今歲六安州之守本官之力獨多士民之公揭科臣入之叙疏坐令褫革將來無肯做敢做之州縣矣永甯鄉紳張論父子捐貲募士夙夜登埤其子

鼎延代父乞恩皇上卽慎重名器何至并其子之官而  
奪之將來無肯做敢做之鄉紳矣臣伏讀明旨謂失事  
處分俱經確核皇上所謂確核者以議處有銓部也議  
罪有法司也稽核糾舉有按臣也皇上試思下之銓部  
卽議降議罰議革矣有執奏曰此不當以考功之法論  
者乎下之法司卽議杖議配議遣矣有執奏曰此不當  
以司寇之法繩者乎至稽查糾劾在按臣不過舉失事  
奏聞有推原功中之罪與罪中之功將全局打算及前  
後著數一一分晰爲皇上告之者乎非諸臣之不肯爲  
分別也知皇上一意重劄言之必不聽且以甚諸臣之

罪故不若不分別之爲愈也上怒詔錦衣逮治開遠若士子也在河南有善政河南士民思之左良玉偕將士七十餘人合奏乞留命釋還戴罪辦賊十一月丁未朔賊攻陝州知州史記言募敢死士出擊之斬數十級生禽三十餘人老回回憤率數萬人攻圍不克會大雪賊乘夜來襲所募士方調他郡越三日城遂陷記言縱火自焚或掖之出曰死此何以自明乃越女墻下賊追獲之令降此日有死知州無降知州也遂被殺指揮李君賜亦手刃數賊而死訓導王誠心里居教諭張敏行姚良弼指揮楊道泰阮我疆鎮撫陳三元百戶明完壁

亦不屈死

致異明史記言傳佚去百戶明完壁今據三編增

越日賊遂出陝州

東下

致異陝州之陷明史本紀系之十月辛卯而史記言左良玉傳俱系之十一月朔秦賊悉其衆薄閿鄉與

張獻忠合自成分攻陝州初四日陷陝城與明史列傳合是月丁未朔初四日則庚戌也蓋賊陷陝卽以越日

東去攻洛陽三編蓋揭明史紀事本末而紀事所載老

回國自閿鄉靈寶東犯仍在十一月據此則本紀因其

傳悉合今

庚戌大學士文震孟何如騶罷震孟既入

閣體仁每擬旨必商之有所改必從喜謂人曰溫公虛

懷何云奸也吾騶曰此人機深詎可輕信未幾體仁窺

其踈所擬不當已意輒令改不從則徑抹去震孟大愠

以諸疏擲體仁前體仁亦不顧給事中許譽卿者故劾

忠賢有聲震孟及吾騶欲用爲南京太常卿體仁忌譽  
卿伉直諷其私人誣劾譽卿爲福建布政使申紹芳營  
求美官體仁擬以貶謫度上欲重擬必發改已而果然  
遂擬斥譽卿爲民紹芳提問震孟爭之不得喞然曰科  
道被誣見斥是天下極榮事賴公玉成之體仁遽以聞  
上果怒責吾騶震孟徇私撓亂吾騶罷震孟落職閒住  
震孟剛方貞介有古大臣風惜三月而斥未竟其用  
賊之東下也雒汝汴皆空虛豫撫陳必謙檄左良王祖  
寬二軍兼行救雒賊將攻雒聞二將至于是高迎祥李  
自成走偃師鞏縣張獻忠走嵩汝戊午寬敗賊于嵩縣

之九臯山越二日又與劉肇基羅岱大敗賊于汝州之  
圪料鎮先後擊斬一千四十七級伏屍二十餘里時以  
汝西之捷爲戰功第一獻忠憤遼兵之再勝也糾合迎  
祥自成等聲攻洛陽以報圪料之役丙寅與寬遇于龍  
門白沙賊設數軍牽綴前行伏起衝我師爲二寬身自  
斷後鬥士無不一以當百自晨接戰至夜半卒大克之  
賊敗衄由鞏縣畧魯山葉縣遂窺光固 是月下庶吉  
士鄭鄮于獄初鄮以忤魏忠賢削籍歸上卽位起故官  
丁內外艱未赴服除應召溫體仁重鄮名見于朝從容  
問曰君自南來聞清議謂何鄮曰謂有君無臣耳體仁

愕然曰天下事已不可爲咎豈在吾輩鄭曰推賢任能  
練兵選將何爲不可體仁怫然起曰君與湛持任此吾  
久欲歸矣湛持大學士文震孟字也體仁方欲傾震孟  
而鄭與震孟同年友善又面許體仁過體仁憾甚震孟  
旣罷去憾未釋摭鄭事無所得遂誣劾鄭假此仙判詞  
逼父振元杖母言出其從母舅舊輔吳宗達時宗達謝  
政歸已七閱月矣上震怒下鄭刑部獄部臣言茂倫大  
罪不可以風聞坐乞飭鄭同鄉官覈奏上責其瞻徇移  
鄭詔獄事迄無左證久不決體仁乃募諸生許曦證之  
曰汝證成鄭獄以中書舍人報汝曦因附會杖母事雜

以帷薄褻語編書布中外謂之放鄭小史而騰章極論  
鄭願與鄭共對簿曰此實鄭二十五年前事鄭詰曦曰  
爾年幾何曰年二十四鄭大呼曰冤乎柰何以二十四  
歲人而證二十五年前事乎曦語塞獄亦未竟而曦果  
擢舍人鄭從父振元上揭訟冤侍郎劉宗周諭德黃道  
周先後論救錦衣吳孟明覆讞抗疏申辨之上深入體  
仁言皆不聽竟磔鄭西市 十二月戊寅城鳳陽 乙  
酉李自成陷光州壬辰總理盧象昇次信陽遣副將祖  
寬破賊高迎祥李自成太敗之于碓山斬五百六十四  
級先是象昇見楚氛小定汝雒告急自湖廣倍道而前

歷郎襄寇葉馳千四百里以上月下旬入汝州遣將李重鎮雷時聲擊賊于城西三十里連戰二日飛矢殪賊千餘斬一百七十七級至是追破賊于信陽賊遂南竄犯江北癸巳圍滁州庚子分陷巢縣掠含山癸卯龔和州知州黎宏業與鄉官原任山陰知縣馬如蛟麾壯士出擊兩戰皆捷賊將犇會風雪大作不辨人色守者皆潰賊遂入城如蛟亟下令能擊賊者予百金須臾得百人巷戰賊多傷力竭俱戰沒鴻業繫印于肘跪告其母李氏曰兒不肖貪微官以累母奈何母泣誓曰勿以我爲意事至此有死而已遂自縊妻楊氏妾李氏及女四

人繼之鴻業北面慟哭再拜自刎未殊濡頸血大書曰  
爲臣盡忠爲子盡孝何惜一死賊入傷數刃而死州判  
錢大用偕妻妾子婦俱死吏目景一高被劊死學正康  
正諫偕妻汪氏子婦章氏赴水死訓導趙世選不屈死  
如蛟兄如蚪如虹家屬十四人亦死鄉官魯一惠張元  
楨貢生魯一璠生員陶應陶廖趙世光魯可爲張宏門  
姚承壽王胤臣王夢暘雷綿祚布衣王良翰楊鳳墀宋  
齡成建中李寅陽郝萬秋馬文舉王之節盛唐盛美皆  
遇害 乙巳老回回諸賊自河南犯陝西洪承疇敗之  
于臨潼 是歲賊自江北而楚而豫而秦又自秦突出

關地邈而南以至江北蔓延幾半天下所過州縣以禦  
寇死事著者陝西則隴州知州胡爾純固守五十餘日  
城陷自縊死延長知縣萬代芳妻劉氏妾梁氏俱從死  
教諭譚恩驛丞羅文魁亦死之澄城主簿李可受鄉官  
王廷賓官永城知縣歸里居城陷俱死之階州學正孫  
仲嗣當事委以城守比陷與妻子十餘人同死鄉官趙  
明盛原官太原府照磨孟宗孔原官漢陽教諭皆以里  
居捍賊死甯羌衛鎮撫曹雲梯遇賊死鳳翔生員屈學  
曾督鄉勇殺賊陷陣死臨潼生員張國楨韓城生員梁  
民泰皆以捍賊死河南則盧氏知縣白楹方被劾去官

賊陷城卒民巷戰力竭自刎死濟源知縣楊于堦殉城  
死滎陽典史周崇禮賊至守小西門比陷巷戰被執罵  
賊死湖廣則鄖陽知縣曹同署上津知縣龔懋澤教諭  
曾發祥江北則臨淮都司陳保山而四川總兵楊玉振  
以赴雒勦賊兵潰遇害政興以上皆八年死事之人三編列節錄同惟三編並載黃岡  
生員易道選乃十六年殉難者諸書及殉難錄同今改